

9. august 2013

UKA 2013/27

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Qalerallit sinerissap qanittuani pisarineqarsimasut „Japan cut“ atorlugu suliareqqaarneqarsimangikkaangata akitsuuserneqartalernissaannut Naalakkersuisut UPA14-mut inatsisassamik siunnersuusioqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Immanuelson, Siumut)

**Tunnngavilersuut:**

Qalerallinnik suliarinneriaaseq „Japan cut“ atorneqaraangat qalerallip niaqua, paperui avaleraalu peerlugit qeritinneqartarpoq. Ukiut qulit matuma siorna taamatut suliarinneriaaseq nunami suliffissaqartitsilluarpoq. Maannakkulli qalerallit ilivitsukkaarlugit poortorlugit qeritiinnariarlugit avammut tunineqartarnerat suliffissaqartitsinngingajavippoq. Ullumikkut avataasiortut aalisarnermut inatsit naapertorlugu Kalaallit Nunaanni tunisassiivinnut tulaassinnaasaat akitsuuserneqartarput Nunatta karsianut akiligassanik. Inatsisartut Inatsisaat nr. 11 3. December 2012-imeersoq naapertorlugu avataasiortut qalerallitaannut akitsuutaasartuq taanna akitsuutigineqartartussap annertussusissaannut aallaaviulluarsinnaasutut isigaara.

Qalerallit sineriammut qanittumi pisat suliarneqaaqqaaratik avammut nioqqutaasartut qanoq inuiaqatigiinnut iluaqutaanerusinnaanerat eqqarsaatigisimavara.

Soorunami suliffeqarfiit namminneq nalilertassavaat qalerallit suliareqqaarnagit avammut nioqqutigisassanerlugit, uangali isumaqarpunga qalerallit suliareqqaarnagit avammut nioqqutaasartut akitsuuteqartittarnissaat inuiaqatigiittut minnerpaamik piumasarisariaqaripput. Taamaliornikkut qalerallit maani nunami suliareqqaarlugit avammut nioqqutigisalernissaat suliffeqarfinnut orniginarnerulersinneqarsinnaavoq, tamannalu suliffissanik amerlanersusunik pilersitsinermik kinguneqarsinnaalluni.

Qalerallip niaqua avaleraalu aamma nioqqutaasinnaammata, nunatsinni qalerallit suliarneqaaqqaartalerpata suliffissanik pilersitsisoqarsinnaanissaa qularinngilara.

Isumaqarpunga taamatut aalajangiinissaq pisuussutit nammineq pigisat iluaqutigineqarnerunissaat eqqarsaatigalugu pisariaqarluinnartuq, taamaaliornikkummi aamma siunertat allat maanna aningaasassaqartinneqanngitsut akissaqartinneqalersinnaammata. Taamaaliorneq aamma Nunatta karsianut pitsaasumik sunniuteqarsinnaavoq.

Suliffeqarfiit angisuut nunatsinni aningaasarsiorneq siuarsarniarlugu tamatta suliniarnitsinnut peqataanerunissaat piffissanngorsoraara, taamatummi siunnersuuteqarninni tamanna aamma siunertaraara.

### **Aningaasaqarnikkut allaffissornikkullu siunnersuutip pisortanut kinguneqaatissai**

Inatsisissatut siunnersuutissaq piareersarneqaaqqaarlunilu nutserneqareeruni il.il. susassalinnut tusarniaatigineqartussaammat, ukiup affaani allaffissornikkut kr. 250.000-nik nalilimmik suliarineqarnissaa naatsorsuutigineqarpoq. Tassunga atatillugu imaassinnaavoq siunnersuut tamatuma kingorna allannngortinneqartoq, taamaassappat suleriaaseq uteqqinneqartussaassaaq.

### **Namminersorlutik inuussutissarsiortunut aningaasaqarnikkut allaffissornikkullu kinguneqaatissai**

Namminersorlutik inuussutissarsiortunut allaffissornikkut sunniutissai annikitsuinnaassangatinneqarput. Umiarsuaatillit/suliffeqarfiit pisanik nakkutilliisunut nalunaartussaareermata, taamalillutillu umiarsuaatillit/suliffeqarfiit nalunaarsugaat Akileraartarnermut Aqutsisoqarfimmut ingerlateqqiinnarneqarsinnaassammata.

Aalajangiiffigisassatut siunnersuut aningaasarsiornermik siuarsaanissamik siunertaqarpoq, suliffeqarfiit qalerallit Kalaallit Nunaanni suliarineqaaqqaartalernernissaannik aningaasarsiornekkut tungavissinneqarnerisigut. Imaassinnaavorli suliffeqarfiit qaleralinnik suliareqqaarneqanngitsunik avammut nioqquteqartarnertik ingerlatsiinnaraat tamanna akilersinnaaneruppat. Suliffeqarfimmit pisisartut qanoq noqqaatiginerat, ingerlatsiviillu nammineq aqqissuussaannermigut aningaasaqarnikkullu qanoq iluseqarnerat kiisalu piginnaanilinnik aalajaatsunik sulisussaarneq apeqqutaassapput.

### **Innuttaasunut aningaasaqarnikkut allaffissornikkullu kinguneqaatissai**

Siunnersuut akuersissutigineqarpat ingerlatsiviit amerlanerusunik sulisoqalernissaat uanga ilimagaara, minnerunngitsumik nunaqarfinni avinngarusimasunilu ullumikkut suliffissaaleqiffiusuni qalerallit tulaanneqartarfiini. Inuit suliffissarqaleqqippata tamanna inoqarfinni annertunerusumik kaaviiartitaqalernermik kinguneqassaaq; siornatigulli oqaatigineqareersutut, suliffeqarfiit qaleralittaminnik nunatsinni avammut nioqquteqartigatik suliarinneqqaartalissanersut apeqqutaassaaq.

Akitsuusiinerup kingunerissavaa suliffeqarfiit qalerallit nunatsinni suliareqqaarnagit avammut nioqqutiginiaraangamikkut Nunatta karsianut akileraaruteqartarnissaat.